

Ұстаз есімі мәртебелі кітапқа жазылды

Отыз жылдан астам уақытын білім беру саласына арнап, нәтижелі еңбегімен танылған Болатбек ОТАШЕВТИҢ жетістіктері жайлы ақпарат «Қазақстанның Алтын кітабына» жазылды.

Болатбек Сабыржанұлы саналы ғұмырын шәкірт тәрбиелеу саласына арнаған білікті ұстаз. «Әке көрген оқ жоңар» дегендей, өңірімізге танымал азамат, «Қазақ КСРО халық ағарту ісінің үздігі», «КСРО оқу – ағарту ісінің үздігі» Сабыржан ОТАШЕВТАН туған ұлдың әке жолын қуып, бала оқытуға ден қойғаны заңдылық та шығар.

Болатбек ОТАШЕВ Арқалық мемлекеттік педагогикалық институтын «Тарих, құқық және экономика негіздері» мамандығы бойынша аяқтап, алғашқы еңбек жолын Аманкелді ауданындағы № 35 училищеді мұғалімдіктен бастаған. Содан бері табан аудармай, 30 жылдан астам уақыт білім беру саласында жұмыс жасап келеді. Үнемі ізденісінің, еңбегінің арқасында көптеген жетістікке жетіп отыр. «Қазақстан педагогтарының Алтын кітабы» республикалық байқауының жеңімпазы, «Ыбырай Алтынсарин» төсбелгісінің иегері. «Білім берудің инновациялық технологиялары» атты республикалық педагогтар сай-



ысында 2 орынды жеңіп алған. Мұнан бөлек, Елбасының: «Болашаққа бағдар, рухани жаңғыру» бағдарламасындағы; «Туған жерге тағзым» бөлімін жүзеге асыруға үлес қосқаны үшін «Құрмет» грамотасын да иеленген болатын. Арқалық қаласының «Жыл адамы – 2015» атағына да лайық деп танылған еді.

«Ұстазы жақсының - ұстамы жақсы». Болатбек Сабыржанұлының шәкірттері де мұғалім мерейін асырып, талмай ізденудің нәтижесінде көптеген шындарды бағындырып үлгерген. Мысалы, шәкірті Айдана НҮРҒАЛИЕВАНЫҢ «Ахмет Байтұрсынұлы – қазақ халқының рухани көсемі» тақырыбындағы ғылыми – зерттеу жұмысы облыстық сайыста 1 орынды жеңіп алса, тағы бір із-

басары Шыңғысхан САБЫРЖАНОВ Алматы қаласында өткен «Алаш қайраткерлерінің Қазақстан тәуелсіздігі жолындағы ғылыми мұрасы» атты республикалық ғылыми – тәжірибелік конференцияға қатысып, «ІІІ дәрежелі дипломмен» марапатталып, Францияда өтетін ғылыми – тәжірибелік конференцияға жолдама алыпты. Басқа да шәкірттері түрлі деңгейдегі додаларда топ жарып, биік деңгейлерін көрсетіп, ұстаз абыройын арттырып келеді.

Осы аталғандардың барлығы ескеріле отырып, 2020 жылы жарық көрген: «Қазақстанның Алтын кітабына» есімі еніп, ұстаз мерейін үстем етті. Жұмықта ғана Родина орта мектебінің директорлық қызметіне тағайындалған Болатбек ОТАШЕВТИ қос жетістігімен құттықтай барғанымызда жүрекжарды лебізін былайша жеткізді. – Әкемнің жолын қуып мен де жауапты һәм мәртебелі мұғалім мамандығын таңдаған едім. Осы салада ширек ғасырдан астам уақыт еңбек етіп келемін. Шәкірттерімнің, кейінгі ұрпақтың болашағына пайдасын әкелер, білім – ғылым үйрету жолында жасаған азды – көпті жұмысым бағаланып, еңбетім еленіп, есімім «Қазақстанның Алтын кітабына» енгеніне қуаныштымын. Болашақта да бар күш – қуатымды білімді, мәдениетті ұрпақ тәрбиелеу ісіне жұмсай бермекпін, – дейді Болатбек Сабыржанұлы.